

# DOMENIE XXXII «VIE PAL AN»

## Jutoris pe Liturgjie

Domenie, ai 12 di Novembar dal 2017

*Il vanzeli di cheste domenie nus presente une fieste di gnocis, dis fantatis, il nuviç che nol rive, la penurie di vueli, la parte sierade... Ma so redut nus vise che: cinc fantatis a jerin cence sintiment e cinc prudentis.*

*I studiâts a disin che Matieu al à scrit cheste parabule cjalant a la sô comunitât di gjudeus-cristians: ancje lôr come lis dis fantatis a començavin a pisolâ e a durmî, o miôr, a sfreidâsi te fede e tal volêsi ben.*

*Motîf: la fadie di sedi un groput fra i paians, il vanzeli che nol vignive acetât, oposizions di ogni sorte, il Signôr che al tardave a rivâ... Valevial la pene di scombatî tant cence viodi un risultât?*

*No sin lontans de veretât se in cheste parabule o viodin il speli des nestrîs comunitâts cristianis di vuê.*

*Ma intant, disìn cu la antifone di jentrade:*

**Antifone di jentrade cf. Sal 87,3**

**Ch'è rivi, Signôr, denant de tô muse la mê preiere;  
slungje al gno lament la tô orele.**

**Colete**

Diu onipotent e bon di cûr,  
slontane di nô dut ce che nus fâs mâl  
par che, pronts cul cuarp e cu l'anime,  
o podin servîti in plene libertât.  
Pal nestrî Signôr Gjesù Crist to Fi, ch'al è Diu  
e cun te al vîf e al regne dutune cul Spirtu Sant,  
par ducj i secui dai secui.

**PRIME LETURE**

**Sap 6,12-16**

**La sapience si lasse cjatâ di chei che le cirin.**

*Pai antîcs la ricercje di une mentalitât sane, di une sapience di vite, e jere un impegn primari; e intant che no o cirin cheste soluzion fur di nô tes technichis modernis, lôr le ponevin dentri, tal cognossi se stes.*

*Pal piu israelit chest al è valit, ma nol baste: la sapience e ven dal alt, dal Signôr e chel ch'al jeve par jê denant di le cjatarà sentade su la sô parte.*

*In cheste sapience che e varà il so culmin te vite di Gjesù, l'om e la femine sclâfs dai idui e dal materialisim dal mont, e diventaran libars tal spirt e un popul e glesie a tornaran a cjatâ la lôr dignitât.*

**Dal libri de Sapience**

La sapience e je sflandorose e no pues smamîsi,  
le cognossin a colp chei che i vuelin ben  
e si lasse cjatâ di chei che le cirin.  
Par fâsi ricognossi, e rive prin di chei che le bramin.  
Chel ch'al jeve par jê denant di nol varà di fadiâ,  
parcè che le cjatarà sentade su la sô parte.  
Pensâ a jê e je la colme dal sintiment,

e chel ch'al vegle par jê al finissarà in curt di strussiâsi;  
parcè che jê e va a cirî chei che i son degns,  
ur comparis tes stradis cun biel trat  
e ur va incuintri in mil manieris.  
Peraule di Diu.

### **SALM RESPONSORIÂL dal Salm 62**

*Savût che la sapience de vite e ven dal alt, il salmist, ancje lui al invoche di podêle cjatâ e al palese dut il so desideri. E je l'anime nestre cuant che cjalant al Signôr e dîs:*

#### **R. E à sêt di te, Signôr, la mê anime.**

*Se cjantât: Il cjant dai salms responsoriâi, p. 82.*  
Diu, Diu gno, sul crichedi o soi pront a cirîti;  
e à arsetât di te la mê anime;  
viers di te la mê cjar e brame  
come une tiere sute, arsinide, cence aghe. **R.**

Cussì mi soi metût a cjalâti tal to santuari  
par viodi la tô potence e la tô glorie.  
Parcè che la tô gracie e vâl plu che no la vite,  
a cjantaran i miei lavris lis tôs laudis. **R.**

Cussì ti benedissarai par dute la vite,  
lis mans viers dal to non o slungjarai.  
La mê vite si passarà come te miôr taulade,  
biel che la mê bocje ti laudarà cjantant di ligrie. **R.**

Cuant ch'o soi sul gno stramaç, ti pensi,  
cuant ch'o vegli gnotvie di te mi visi.  
Tu sês stât tu il gno jutori,  
jo mi jempli di gjonde sot des tôs alis. **R.**

### **SECONDE LETURE**

**1 Ts 4,13-18**

**Diu al tirarà dongje di se chei che si son indurmidîts midiant di Gjesù.**

*Ancje se il lengaç al pues sedi lontan di noaltris, la sostanza dal discors e je ancje par noaltris. Tignìn vuê presinte cheste leture par doi motifs: parcè che o sin frescs de zornade-memorie dai muarts e parcè che i muarts in Crist a resussitaran par prins. E daûr ancje nô... Dit chest, l'Apuestul al conclût: Confuartaitsi alore un cul altri cun chestis peraulis.*

#### **De prime letare di san Pauli apuestul ai Tessalonicês**

Fradis, no volin lassâus ta l'ignorance rivuart a chei ch'a duarmin, par che no vedis di avilîsi come chei altris che no an sperance. Di fat se o crodin che Gjesù al è muart e al è resussitât, cussì o vin ancje di crodi che Diu al tirarà dongje di se chei che si son indurmidîts midiant di Gjesù. Chest us al disin su la perauale dal Signôr: che nô, ch'o sin in vite e o sarin restâts ancjemò culi, cuant che al tornarà il Signôr no rivarin prime di chei che si son indurmidîts. Parcè che il Signôr in persone, al comant, a la vôs dal arcagnul, al sun de trombe di Diu al vignarà jù dal cîl e i muarts in Crist a resussitaran par prins. E daûr ancje nô, ch'o sin in vite, ch'o sarin restâts ancjemò culi, o sarin puartâts sù cun lôr parsore dai nûi par lâ incuintri al Signôr. E cussì o sarin simpri cul Signôr. Confuartaitsi alore un cul altri cun chestis peraulis.  
Peraule di Diu.

## CJANT AL VANZELI

cf. Ap 2,10

### R. Aleluia, aleluia.

Ten dâr fint a la muart, al dîs il Signôr,  
e ti darai la zoe de vite.

R. Aleluia.

## VANZELI

Mt 25,1-13

### Ve il nuviç, lait incuintri!

*Cuâl nuviç in zornade di vuê? Gjesù di Nazaret, il Fi di Diu e servidôr fedêl di Diu pal nestri ben. Pe umanitàt, la sô presince e peraule a son la vere fieste des gnocis; però cjalant a lis nestris comunitâts che si distudin, al ven di dî che il nuviç nol rivave mai, e duncje il pericul des fantatis al è ancje par nô: si lassarin cjapâ dutis de sium e s'indurmidirin.*

*Però si sintì un berli: Ve il nuviç, lait incuintri! Fra cualis fantatis si cjatarìno? Parcè che al è scrit: Cinc di lôr a jerin cence sintiment e cinc prudentis. Jentrarìno cun lui te sale de gnoce o sintarìno la vôs che nus vise: No us cognòs! ?*

*Dutis domandis che Matieu al poneve a la sô comunitât ma che a restin motif di serie riflession par operâ tes nestris comunitâts di vuê. Di fat: Veglait duncje, parcè che no savês ni la zornade ni l'ore.*

### Dal vanzeli seont Matieu

In chê volte, Gjesù al disè cheste parabule ai siei dissepui: «Il ream dai cîi al sarà compagn di dîs fantatis ch'a cjaparin sù i lôr ferâi e a saltarin fûr incuintri al nuviç. Cinc di lôr a jerin cence sintiment e cinc prudentis. Di fat chês cence sintiment, cuant che a cjaparin sù i lôr ferâi, no si impensarin di puartâsi daûr ancje il vueli; lis prudentis invece, insieme cui ferâi, a cjaparin sù ancje il vueli tes vasulis. Stant che il nuviç nol rivave mai, si lassarin cjapâ dutis de sium e s'indurmidirin.

Ma a miezegnot si sintì un berli: Ve il nuviç, lait incuintri! Alore dutis chês fantatis si svearin e a sistemarin i lôr ferâi. Chês cence sintiment ur diserin a lis prudentis: Daitnus un sclip dal vuestri vueli, che i nestris ferâi si distudin. Lis prudentis ur rispunderin: No, lafè! Che no vedin di restâ cence nô e vualtris. Lait pluitost a comprâlu di chei che lu vendin. Biel che chês a levin a comprâ il vueli, al rivà il nuviç e lis fantatis ch'a jerin prontis a jentrarin cun lui te sale de gnoce e la puarte si sierà. Plui in ca a rivarin ancje chês altris fantatis e a diserin: Signôr, Signôr, vierzinus! Ma lui ur rispindè: Us al dîs in veretât: no us cognòs!

Veglait duncje, parcè che no savês ni la zornade ni l'ore».

Peraule dal Signôr.

### Su lis ufiertis

Cjale di bon voli, Signôr, lis ufiertis che ti presentin  
par che, cuntune sante disposizion,  
o podin vê ce ch'o celebrin tal misteri de passion di to Fi.  
Par Crist nestri Signôr.

### Antifone a la comunion

Sal 22,1-2

Il Signôr al è il gno pastôr: no mi manjarà nuie.

Mi fâs polsâ là che i passons a sverdein,  
mi mene là ch'a son aghis frescjis.

### O ben: cf. Lc 24,35

I dissepui a ricognosserin Gjesù, il Signôr, tal crevâ il pan.

### Daspò de comunion

Ti ringraciìn, Signôr,  
di vênus sostentâts cul to sant regâl  
e o preìn il to boncûr  
che il to Spirt al conservi in grazie e scletece  
chei ch'a àn ricevude la fuarce dal cîl.  
Par Crist nestri Signôr.

\* \* \*

### **Riflession di pre Antoni Beline: Il ferâl**

Si trate, naturalmentri, di usancis d'in chê volte, bielis cence fin, cuant che dutis lis fantatis a levin a fâj fieste al nuviç. Parcè che il matrimoni al è simpri stât une robe di dut il borc o di dut il paîs, sint un at e un fat che al intaresse l'avignê stes dal mont. E la fieste dal nuviç e jere fieste di ducj, sore dut des fantatis, che a viodevin svissinâsi an par an, di par di, la lôr ore bramade e temude.

Lis fantatis, cui ferâi ben furnîts di vueli...

*Vanseli par un popul, an A, p. 214*

\* \* \*

### **Sante messe e Eucaristie, rîts, preieris, cjants: Hosanna pp. 34 - 119.**

\* \* \*

*La mia vita si svolge fra questi due opposti:  
la mia povertà e la tua sovrabbondante misericordia.  
Donde il mio sospiro e il mio grido:  
Vieni, Signore, non tardare!"*

Don Primo Mazzolari

\* \* \*

- \* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*
- \* *Il cjant dai salms resposoriâi, Ed. Glesie Furlane, 2012.*
- \* *50 corâi de cristianitât todescje voltâts par furlan, ed. Glesie Furlane, 2016.*
- \* *Il libri des riflessions sul Vanzeli al è: pre Antoni Beline, Vanzeli par un popul, an A, Ed. Arti Grafiche Friulane.*
- \* *Par domandâ chescj libris scrivêt a [info@glesiefurlane.org](mailto:info@glesiefurlane.org)*